



World Vision

Informativno izdanje organizacije World Vision u Bosni i Hercegovini

broj 3 | zima 2013

U OVOM BROJU:

**PRIČA SPONZORA IZ TAJVANA
NAS SVI SLUŠAJU
SVEŠTENIKOVA PRIČA
INTERVJU: Anita Tomić**



**NAŠA VIZIJA ZA SVAKO DIJETE JE ŽIVOT U SVOJ NJEGOVOJ PUNOĆI
NAŠA MOLITVA ZA SVAKU DUŠU JE VOLJA DA SE TO I OSTVARI**

O ORGANIZACIJI WORLD VISION

World Vision je kršćanska organizacija za pomoć, razvoj i zagovaranje, posvećena radu sa djecom, porodicama i zajednicama kako bi prevazišli siromaštvo i nepravdu. World Vision je u službi svih ljudi bez obzira na njihovu vjeru, rasu, etničku pripadnost ili spol.

World Vision u Bosni i Hercegovini djeluje od 1994. godine kada je počeo sa provedbom brojnih humanitarnih i rehabilitacijskih projekata, što je uključivalo i projekte vezane za zdravstvenu skrb, liječenje ratnih trauma, mikro-poduzetništvo i poljoprivredu. Do 1996. godine, World Vision je pomogao više od milijun ljudi u našoj zemlji.

Danas, World Vision radi na tome da ostvari svoju težnju: da Bosna i Hercegovina bude društvo prijateljsko prema djeci, utemeljeno na zajednici povjerenja, gdje svako dijete ima nadu, jednake mogućnosti, te je osnaženo da ostvari svoj puni potencijal.

POSJETA AMBASADORA DOBRE VOLJE IZ KOREJE



Od 19. do 22. novembra 2012. godine u Bosni i Hercegovini je boravio Inhyuk Choi, poznati gospel pjevač iz Južne Koreje koji je i Ambasador dobre volje organizacije World Vision. U toku svoje posjete, Ambasador Choi je obišao World Visionov Razvojni program Lašva, te se susreo sa djecom koja učestvuju u projektu sponzorstva.

Ambasador Choi je posjetio i Osnovnu školu Safvet-beg Bašagić u Visokom u kojoj su realizovani mnogi projekti World Vision-a, od zamjene vrata učionica, postavljanja video nadzora, do uređenja školskog dvorišta i nabavke klavira za muzičku sekciju. Tom prilikom muzička sekcija škole je za Ambasadora Choia otpjevala nekoliko pjesama, a na samom kraju programa zapjevao je i Ambasador na korejskom i bosanskom jeziku.

“Ovaj dan ću pamtili zauvijek. Za mene je bilo veoma impresivno pjevati sa djecom” kazao je Ambasador Choi koji sponzorise desetero djece širom svijeta.



PRIČA SPONZORA IZ TAJVANA



Jednog sunčanog jesenjeg dana, 21-godišnja Su Yi An postala je prvi sponzor iz Tajvana koji je posjetio Bosnu i Hercegovinu. Ova vesela studentica njemačkog jezika, koja trenutno živi u Beču, sponzor je od svoje 18. godine, i tokom ove tri godine sponzorisała je 14-godišnjeg Ramiza iz World Visionovog Razvojnog programa Majejica. I tog sunčanog jesenjeg dana, oni su se po prvi put susreli.

Dok se vozimo niz krivudavu cestu prema mjestu sastanka, Su Yi An nam govori o tome kako je postala sponzor. "Željela sam uraditi nešto dobro za svijet. A kako sam uvijek znala za World Visionov rad, pomislila sam: Što da ne?" kaže ona. Ona se često dopisuje sa dječakom i pamti ono što joj je on napisao. "Njegova mama pravi dobre baklave" smije se "A on voli da pliva u obližnjem jezeru".

Ramiz i 16-godišnji Almir dočekali su Su Yi An u dvorištu svoje škole. Almira sponzorira Su Yi Anin prijatelj, također sa Tajvana. Almir je dobio pismo od svog sponzora, a on odmah obećava da će na njega odgovoriti čim dođe kući. Obojica dječaka su

stidljiva i nakon upoznavanja, svi zajedno ulaze u školsku zgradu. Tamo Su Yi An ima priliku da vidi kako ona i ostali donatori iz Tajvana doprinose poboljšanju obrazovnih i životnih uslova djece u Razvojnem programu Majejica. U školskom hodniku posebno mjesto zauzima tabla koja prikazuje projekte koje je podržao World Vision. "Ovo putovanje je proširilo moje vidike" kaže Su Yi An. "Otkrila sam kako su ljudi ovdje gostoljubivi i spremni pomoći, iako smo skoro uvijek trebali papir i olovku da komuniciramo".

Projekat sponzorisanja djece je način prikupljanja dogoročne potpore za djecu, dok se u isto vrijeme donatorima pruža bogato i nagrađujuće iskustvo. Projekat sponzorstva djece uspostavlja vezu između donatora i djeteta na način da djetetove potrebe personaliziraju izazove sa kojima se zajednica suočava, te pružaju donatorima priliku da vide na koji način donatorska sredstva prave razliku u životima djeteta, porodice i zajednice.



NAS SVI SLUŠAJU



Mnoštvo malih ruka je u zraku. Čini se kao da svako želi dobiti novinarski zadatak. Učiteljica Tatjana prolazi kroz slatke muke dok pokušava da odluči ko od djece će pripremiti materijal za slijedeće izdanje dječije radio emisije.

Kucanje na vratima prekida čas i učiteljica izlazi. Ubrzo se vraća u učionicu držeći za ruku dječaka čiji otac je zamolio da i njegov sin učestvuje u radionici. Ovo ne iznenađuje Tatjanu. "Na samom početku planirali smo da 30 djece učestvuje u radionicama, ali sa svakom sedmicom taj broj se povećava. Sve više i više djece želi da učestvuje. Čini se da imamo dobru reputaciju" sa osmjehom kaže Tatjana.

Radionica na kojoj učestvuju ova djeca dio je većeg projekta "Nas svi slušaju" koji ima za cilj da promoviše pozitivne društvene vrijednosti kod djece putem osmišljavanja i pripremanja obrazovne radio emisije na OSM radiju u World Visionovom Razvojnem programu Jahorina. Projekat je kreirala organizacija "Klub ideja" kao odgovor na zasićenost bosanskohercegovačkih medija nasiljem, skandalima i ostalim programskim sadržajima koji nisu prilagođeni dječijem uzrastu i potrebama. U trci da pridobiju što više slušalaca, medijski sadržaji često nemaju nikakve obrazovne vrijednosti, niti djeci pružaju odgovarajuće uzore. "Želimo iskoristiti

medije, koji su najmoćnije oružje na svijetu, kako bi se ispunile potrebe djece" kaže Tatjana.

Projekat čini niz radionica sa učenicima osnovnih škola koji se podučavaju osnovama novinarskih vještina i pripremaju sadržaj za radio emisiju. Radio emisija naziva "Nas svi slušaju" se emituje svake nedjelje na OSM radiju i traje pola sata. Simboličan naslov emisije način je da se privuče pažnja slušalaca. "Želimo da svi slušaju nas, želimo da se čuju dječije potrebe i glas" objašnjava Tatjana.

Većina djece na radionici drži sveske u kojima se nalaze materijali koje su pripremili kod kuće. Anina sveska puna je zanimljivosti koje je pronašla. "Jeste li znali da delfini spavaju dok im samo pola mozga radi?" ona uzbuđeno čita iz teke. Neki od Aninih prijatelja uradili su intervju sa piscima, pjesnicima i ostalim javnim ličnostima iz njihove zajednice. Neki su intervjuisali i polaznike karatea iz Karate kluba Romanija koji radi sa djecom sa posebnim potrebama, što je također podržao World Vision.

"Ovo je izvanredno iskustvo" kaže devetogodišnji Petar.



OSNOVNI TRENING SPONZORSTVA ZA DJECU

Kako bi se djeca upoznala sa radom i planovima organizacije World Vision, te osnažila potrebnim životnim vještinama, World Vision je organizirao prvi Osnovni trening sponzorstva prilagođen djeci uzrasta sedmog razreda osnovne škole.

Trening je održan u World Visionovom Razvojnog programu Lašva u periodu od 27. do 29. novembra 2012. godine i okupio je 23 djece iz dvanaest osnovnih škola. Ovaj trening je posebno važan ako imamo na umu da je u pitanju trening koji je prvobitno bio predviđen za odrasle, te je revidiran u skladu sa onim što je djeci potrebno i šta mogu uraditi.

srednjoškolcima i volonterima iz omladinskih organizacija, njih ukupno 23. I oni su bolje upoznati sa ciljevima World Visiona i projektom Sponzorisanja djece, a osim toga, sa ovom grupom se razgovaralo o poticanju volonterizma među mladima i prijedlozima za buduće aktivnosti sa djecom i omladinom na području općina Kakanj i Visoko.

Osim što su dali konkretne ideje za buduće aktivnosti World Visiona, mnogi učesnici su došli do ideja šta bi i sami mogli uraditi za pozitivne promjene u svojim zajednicama, kroz volonterizam i građanski aktivizam.



U sklopu treninga, učesnici su imali priliku prisustvovati sesiji o učešću u zajednici, razvojnim kapacitetima i pravima djece. Djeca su mogla i čuti više o samom projektu sponzorisanja koji provodi World Vision u Bosni i Hercegovini, njegovim osnovama, te su posjetili i ured Razvojnog programa Lašva gdje su im World Visionovi zaposlenici objasnili kako projekat sponzorstva funkcioniše.

Učesnici su također mogli dati i svoje ideje za rješavanje problema u zajednicama iz kojih dolaze, te predstaviti modele i ideje za realizaciju. Nakon ovog treninga sa djecom, osoblje Razvojnog programa Lašva provelo je sličan trening sa

Oba treninga su bila vrlo produktivna, a poznanstva i novoizgrađeni odnosi sa mladim predstavnicima zajednica poslužiće kao dobra osnova za buduću saradnju i realizaciju smislenijih i korisnijih inicijativa za dobrobit njihovih zajednica. I djeca i mladi su izrazili želje da ostanu u kontaktu i prošire saradnju sa World Visionom i da baš oni postanu dio našeg tima.



SVEŠTENIKOVA PRIČA

Silom ratnih razaranja, u jeku građanskog rata u Bosni i Hercegovini, sa svojom porodicom izbjegao sam iz Tuzle (gdje su mi rođeni i roditelji i ja) u Zvornik. Sve teškoće rata i izbjeglištva probudile su i ojačale vjeru u Boga u mojoj porodici. Osnovnu školu završio sam se u Zvorniku 2003. godine sa odličnim uspjehom. Kako sam imao veliku želju da učim vjersku školu i postanem sveštenik, blagodareći Episkopu zvorničko-tuzlanskom Gospodinu Vasiliju određen sam na četvorogodišnje školovanje u Bogosloviji u Beogradu. Istu sam 2007. godine završio sa odličnim uspjehom. Blagodareći postignutim rezultatima, određen sam na dalje školovanje na Moskovsku Pravoslavnu Duhovnu Akademiju u Moskvi na kojoj sam i diplomirao 2010. godine sa visokim ocjenama.

Jedna od posledica rata u Bosni i Hercegovini bila je i da kroz svoje djetinjstvo nisam imao priliku družiti se niti razgovarati sa nepravoslavicima.

World Vision je prepoznao potencijal i kapacitet Crkava i vjerskih zajednica na polju smanjenja stigme prema osobama koje žive sa HIV-om. Na prvom sastanku 2010. godine, u organizaciji World Vision BiH i Međureligijskog vijeća BiH, prisustvovali su predstavnici četiri tradicionalne crkve i vjerske zajednice u Bosni i Hercegovini (ja sam bio određen ispred Srpske pravoslavne Crkve). Na sastanku sam bio poprilično oprezan i sumnjičav u mogućnost saradnje i zajedničkog nastupa na rješavanju ovog velikog društvenog problema, baš zbog predrasuda koje su nastale kao posljedica građanskog rata.

Međutim, kroz projekat Stigme, zbližio sam se i sprijateljio sa predstavnicima drugih religija, te se moj tvrdi stav sa početka projekta skroz promjenio. Dve godine posle onakvog početka, održali smo veliki broj zajedničkih seminara i radionica na temu HIV-a i stigme koja ga prati. Iz te naše saradnje, izraslo je jedno veliko prijateljstvo sa moje strane i čitavog osoblja World Visiona kao i sa predstavnicima Islamske zajednice, Rimokatoličke crkve i Jevrejske zajednice u Bosni i Hercegovini.

Prošavši 2011. godine trening Putevi nade na temu HIV-a, održao sam preko 40 radionica za sveštenike, i pravoslavne vjernike, na preko 20 učestvovao, prilagodio Priručnik na temu HIV-a, napisao brojne brošure i predavanja na tu temu. Posebno bih istakao svoje zadovoljstvo jer sam 2012. godine bio predavač na treningu Puteva nade u organizaciji World Visiona. U septembru 2012. godine oženio sam se, a moja supruga je također prošla trening Putevi nade na kojem sam bio predavač. Na svadbi na kojoj je bilo 600 zvanica, najdraži gosti bili su mi uposlenici World Visiona sa porodicama, kao i prijatelji iz Islamske i Jevrejske zajednice. Za ovo prijateljstvo dugujem veliku zahvalnost World Visionu.

Danas služim Bogu i svome narodu kao sveštenik Srpske pravoslavne crkve, ali u novoj ulozi nastavio sam da saradujem sa World Visionom, i jos usrdnije i sa većim žarom radim na razbijanju stigme među pravoslavnim vjernicima prema osobama koje žive sa HIV-om.

napisao:

sveštenik Miloš Trišić koji radi kao sveštenik u Tuzli, gdje je i rođen

Promocija Programskih modela za zdravlje Roma u Bosni i Hercegovini, koju su zajednički organizirali World Vision i Ministarstvo za ljudska prava i izbjeglice u FBiH, održana je u Sarajevu 24. septembra 2012. godine. Promociji su prisustvovali predstavnici organizacije World Vision, Federalnog ministarstva za ljudska prava i izbjeglice, te predstavnici romske manjine u našoj zemlji. Programski modeli za zdravlje Roma u Bosni i Hercegovini bave se seksualno prenosivim bolestima s posebnim naglaskom na HIV i AIDS, ranim otkrivanjem TBC-a i većim obuhvatom djece imunizacijom. Promocija Programskih modela u Republici Srpskoj je održana u Banja Luci 3. decembra 2012. godine



MEMORANDUM O SARADNJI SA MINISTARSTVIMA ZDRAVLJA I OBRAZOVANJA I NAUKE FBIH

Nacionalni direktor organizacije World Vision u Bosni i Hercegovini, Hans Bederski potpisao je 21. septembra 2012. godine Memorandum o saradnji sa Ministarstvom zdravlja FBiH i Ministarstvom obrazovanja i nauke FBiH. Memorandumom se predviđa zajednička saradnja World Visiona i pomenutih ministarstava na izradi standarda za ishranu djece predškolskog uzrasta.

Potpisivanju Memoranduma prisustvovali su federalni ministri zdravlja prof. dr. Rusmir Mesihović i obrazovanja i nauke Damir Mašić. Potpisivanje ovog Memoranduma je nastavak aktivnosti koje World Vision provodi na području naše čitave zemlje kako bi se poboljšala prehrana najmlađih. Predstavnici World Vision-a već su

potpisali Memorandum sa Ministarstvom prosvjete i kulture RS i Ministarstvom zdravlja i socijalne zaštite kojim se predviđa zajednička saradnja na kreiranju smjernica i standarda za ishranu djece predškolskog uzrasta.



Grupa od osmero mladih iz Bosne i Hercegovine – Marinko, Zlatan, Emina, Nadir, Benjamin, Amna, Aldina i Silvana - učestvovala je na regionalnoj konferenciji organizacije World Vision „Svijet kakav mladi žele“ koja je održana u Tsakhkadzoru u Armeniji od 13. do 16. septembra 2012. godine.



Glavni cilj ove konferencije bio je da dâ priliku mladima da se uključe u jedno od najvažnijih dešavanja njihove generacije – utjecanje na stvaranje okvira za Milenijske razvojne ciljeve nakon 2015. Mladi iz Bosne i Hercegovine, Kipra, Gruzije, Armenije, Rumunije, Kosova i Albanije okupili su se na konferenciji kako bi raspravljali i odlučili o svojoj poziciji i napravili konkretne prijedloge. Ovi prijedlozi su dokumentirani i bit će predstavljeni na

dvije nacionalne konzultacije koje će UN održati u Armeniji i Pakistanu.

Konferencija „Svijet kakav mladi žele“ uključivala je plenarne sesije, treninge i radionice, te međureligijski dijalog, a okupila je mlade aktiviste, novinare, trenere i stručnjake iz Albanije, Armenije, Bosne i Hercegovine, Gruzije, Kipra, Kosova i Rumunije.

„Stvari koje sam naučio u Armeniji, pored samog putovanja i razmjene kulture, nikada neću zaboraviti, a sa ljudima koje sam tamo upoznao sam ostao u kontaktu, što je za mene jedan veliki uspjeh“ napisao je 16-godišnji Benjamin o svom učešću na konferenciji.

Milenijske razvojne ciljeve čini osam ciljeva, koje je međunarodna zajednica usvojila 2000. godine, a koji postavljaju ciljne vrijednosti koje se trebaju dostići do 2015. Ciljevi se odnose na ukidanje siromaštva, dostizanje univerzalnog osnovnog obrazovanja, promoviranje rodne jednakosti i osnaživanje žena, smanjenje smrtnosti djece, unaprjeđenje zdravlja porodilja, borba protiv HIV-a i AIDS-a i drugih bolesti, osiguranje okolišne održivosti i pružanje financiranja za razvoj.





OBILJEŽAVANJE SVJETSKOG DANA BORBE PROTIV AIDS-A

Povodom Svjetskog dana borbe protiv AIDS-a, World Vision je postavio informativne štandove na kojima su građani mogli saznati više o tome kako se zaštititi od HIV-a i AIDS-a. Svrha štandova je podizanje svijesti o gore navedenoj temi; što uključuje pružanje informacija o dobrovoljnom i povjerljivom savjetovanju i testiranju na HIV, kao i ostale relevantne informacije koje se tiču ovog virusa/bolesti, podjela promotivnih i informativno-edukativnih materijala i brošura, kao i promociju romskih HIV Info Centara.

Štandovi su bili postavljeni u Tuzli, Banovićima, Čeliću, Lukavcu, Sarajevu, Ilijašu, Kaknju, Zenici, Prnjavoru, Prijedoru, Gradišci, Bijeljini i Derventi. Aktivnosti sprovode HIV Info Centri sa svojim terenskim radnicima, angažovanih na projektu "Maksimalna pokrivenost efektivne HIV prevencije i njege među populacijama pod uvećanim rizikom - Romska populacija" kojeg implementira World Vision u saradnji sa partnerima, u okviru R9 programa GFATM za Bosnu i Hercegovinu.

Pored postavljanja informacionih štandova, World Vision organizirao je i konferenciju za medije na kojoj su predstavljeni stavovi i aktivnosti vjerskih organizacija po pitanju smanjenja stigme prema osobama koje žive s HIV-om. Konferencija za medije dio je World Vision-ovog projekta „Smanjenje stigme“, i ima za cilj podići svijest šire javnosti o problemu AIDS-a i načinima na koji su se vjerske organizacije uključile u njegovo rješavanje.

World Vision je vrlo rano prepoznao važnu ulogu crkava i vjerskih zajednica i utjecaj koji imaju na smanjenje stigme prema osobama koje žive sa HIV-om, kao i na zadovoljenje potreba društva za prevencijom, brigom i podrškom u Bosni i Hercegovini. Projekat "Smanjenje stigme" podrazumijeva aktivno uključivanje predstavnika vjerskih zajednica (Islamska zajednica, Srpska pravoslavna crkva, Katolička crkva i Jevrejska zajednica) po pitanju HIV-a i AIDS-a, te njihovu mobilizaciju kako bi se realizovala efikasna implementacija HIV i AIDS prevencije, zagovaranje i iniciranje aktivnosti njege i podrške.

DOBROBIT DJECE JE NAŠ GLAVNI FOKUS

Anita Tomić, voditeljica World Visionovog projekta sponzorstva u Bosni i Hercegovini



World Vision već godinama provodi projekat sponzorstva u Bosni i Hercegovini. Možete li nam reći šta tačno znači sponzorstvo i šta obuhvaća ovaj projekat?

Sponzorisanje djece je oblik partnerstva sa pojedincima i/ili porodicama koji žele izdvojiti određena finansijska sredstva i pružiti podršku djeci i njihovim zajednicama putem World Visionovih razvojnih programa.

Sponzorisanje djece nije tzv. klasično sponzorisanje kada dijete dobiva novčanu podršku za školovanje, život ili sl. nego bi se to više moglo nazvati podrškom usmjerenom na dobrobit djece i njihovih porodica u zajednicama u kojima radi World Vision. Projekti koji se financiraju iz programa sponzorisanja djece su raznoliki, uglavnom usmjereni na potrebe djece i njihov razvoj, te poboljšanja u oblasti obrazovanja, zdravlja, dječije zaštite, duhovnog i emotivnog razvoja, te ekonomskog razvoja porodica i zajednica.

Djeca koja su odabrana za program sponzorisanja su djeca školske dobi, te su oni predstavnici sve djece u zajednici i imaju važnu ulogu 'malih ambasadora'. Kroz redovno dopisivanje i kontakt sa svojim prijateljima/sponzorima iz Tajvana i Južne Koreje, razvijaju se prijateljstva, uči se o različitim kulturama, djeca informišu o različitim aktivnostima u kojima su učestvovali, šalju čestitke za praznike i Novu godinu, izvještaje o svom razvoju. itd. Na ovaj način, sponzorima omogućujemo informaciju o tome što se promijenilo u životima djece i razvoju zajednice tokom deset godina koliko traje jedan programski ciklus.



Tokom 60 godina koliko traje program sponzorisanja djece u preko 100 zemalja, World Vision je razvio djelotvorne pristupe u radu sa djecom, roditeljima i zajednicama kako bi osigurao poboljšanja u životima, odgovorio na siromaštvo i doprinio održivom razvoju zajednica.

Na koji način projekat sponzorstva utiče na živote djece, njihovih porodica i zajednica u kojima žive?

Dobrobit djece je glavni fokus programa sponzorisanja djece, što znači da ovaj program omogućuje da se ljudi, koji brinu o pitanjima siromaštva ili ugroženih prava djece, kao što su naši sponzori, mogu direktno uključiti u rješavanje problema u BiH. Na taj način, sredstva prikupljena u fond za program omogućavaju djeci i svim ljudima u zajednici da aktivno učestvuju u rješavanju problema i planiranju aktivnosti koje su ključne za dobrobit djece i koje su u najboljem interesu djeteta. World Vision, pored sredstava iz programa sponzorisanja, angažuje i same ljude u zajednicama i nadležne ustanove i vlasti, kako bi se izgradili resursi neophodni za bolju brigu o djeci u zajednicama. Program sponzorisanja djece može doprinijeti da djeca imaju sretnije djetinjstvo i svaka programska aktivnost treba da bude tome i posvećena. Djeca su ohrabrena da učestvuju u programu i donose odluke o pitanjima koja se tiču njih; djeca žele da znaju da će neko brinuti o njihovim potrebama; djeca žele da imaju mogućnost da se školuju i sretno odrastaju; djeca žele znati da se njihova mišljenja i ideje uvažavaju i da su cijenjena; djeca žele da se druže, igraju, zabave... ali i da budu aktivni u svojim zajednicama. To su aspekti na koje programi World Visiona utječu, dijete je uvijek u fokusu i u kontekstu sa porodicom i zajednicom. Dugoročno želimo postići zdravo i sigurno okruženje za djecu, i to radimo zajedno sa djecom.

Nabrojite neke od aktivnosti koje je World Vision podržao kroz projekat sponzorstva?

Programi koji se realiziraju u šest razvojnih oblasti World Visionovog djelovanja su raznoliki, ali uvijek i većinom usmjereni na:

- razvijanje vještina i edukativno-zabavne sadržaje za djecu koji se realiziraju u suradnji sa školama i partnerima iz nevladinih organizacija, npr. podrška za bolje učenje i uvjete školovanja koja se ogleda kroz nabavke raznih školskih materijala i učila, sportske, audio-video opreme, rekonstrukcije i opremanje fiskulturnih sala, izgradnje dječijih igrališta; vršnjačku edukaciju o zdravim navikama (HIV, AIDS), ishrani i spolno-reproduktivnom zdravlju, edukacija o pravima djeteta, ljetni kampovi, obrazovne radionice za djecu Rome; učenje o kulturno-historijskom naslijeđu, ekologiji i duhovnom razvoju.



- pravo na učešće - uključivanje djece u njihov sopstveni razvoj i kreiranje malih projekata, npr. učešće na edukativnim radionicama za učenje o toleranciji i demokraciji, profesionalna orijentacija učenika; rad i podrška Vijećima učenika za njihov angažman u pripremi projekata i donošenje odluka; socijalizacija djece sa posebnim potrebama, volonterizam...

- povremena direktna pomoć djeci osjetljivog socijalnog, obrazovnog i/ili zdravstvenog statusa, npr. hitne intervencije koje mogu pomoći djetetu i porodici, od nabavke lijekova, nabavke školskih udžbenika, do liječenja i slično.


- podrška porodicama djece uključene u World Visionove programe putem podrške malom biznisu ili ostvarivanju prihoda od uzgoja voća i povrća.

- podrška duhovnom razvoju i odgoju u suradnji sa predstavnicima vjerskih zajednica, kao što su međureligijski dijalog, uvažavanje različitosti, posjete vjerskim objektima, itd - opremanje školske zubarske ambulante.

Ko su sponzori i zbog čega se neko odluči učestvovati u projektu sponzorstva?

Prijatelji-sponzori su pojedinci/podružice iz Južne Koreje i Tajvana koji žele pomoći djeci u Bosni i Hercegovini. Program sponzorisanja započeo je u Koreji nakon rata koji je uništio tu zemlju, i danas, skoro šezdeset godina kasnije, mnogi od naših prijatelja/sponzora su se uključili u ovaj program jer osjećaju odgovornost da pomoć koju su primili od svijeta u tom periodu na neki način vrate tako što će pomoći ljudima u zemljama gdje je to potrebno.

Vođeni su isključivo dobrom voljom, suosjećanjem, ljudskom potrebom da budu dobri ljudi, a neki i kršćanskim vrijednostima i svi žele pružiti nadu u bolju i sretniju budućnost za djecu. Ti ljudi su odrasli u svijetu koji više cijeni duhovne od materijalnih vrijednosti i zato im je važno da srcem učestvuju i pomažu dobrobit djece u našoj zemlji. Sponzorima-prijateljima je važno da pošalju poruku da dijete i porodica trebaju aktivno učestvovati u razvoju svoje zajednice, pomagati jedni drugima, imati osjećaj za one kojima je teško u nekom periodu života i izgraditi moralne i etičke vrijednosti koje će mladome čovjeku uvijek biti vodiča za budućnost.





Mladi volonteri iz Olova koji su organizirali humanitarni sportski turnir kako bi pomogli bolesnoj prijateljici iz razreda.

AKTIVNI GRAĐANI I GRAĐANKE

Regionalni projekt "Osnaživanje mladih žena za nadgledanje vladinih obaveza pri ostvarivanju jednakosti spolova" podržava Evropska unija, a u njemu učestvuju oko 160 mladića i djevojaka iz Bosne i Hercegovine, Srbije i Crne Gore.

Međunarodna razmjena i suradnja u okviru projekta „Osnaživanje mladih žena za praćenje vladinih obaveza iz oblasti rodne ravnopravnosti“ povezala je više od 150 mladića i djevojaka iz Srbije, Crne Gore i Bosne i Hercegovine, tokom intenzivne obuke za lokalno zagovaranje, u borbi za jednaka prava za žene i muškarce. Seminari i radionice su održani u Beogradu, Podgorici, Zenici, Sarajevu, na Jahorini, Vlašiću... Vrijedno se učilo, ali našlo se vremena i za relaksaciju, druženje i sklapanje novih prijateljstava koja ne poznaju državne, nacionalne, vjerske, rodne i ine granice...

Svoj aktivan građanski angažman, učesnici i učesnice Projekta već pokazuju ozbiljno se pripremajući za poticanje dijaloga sa lokalnim vlastima i ustanovama koje pružaju esencijalne usluge u zajednicama iz kojih dolaze. Cilj „Glasa i akcija građana/ki“, World Visionove metodologije lokalnog zagovaranja, je ojačati odnos između građana i države, odnosno izabраниh zvaničnika i onih koji pružaju usluge, kroz edukaciju i

osnaživanje lokalne zajednice, a sve u svrhu poboljšanja kvalitete usluga i odgovornosti države prema građanima, ali i angažmana i suradnje građana/ki u vlastitoj zajednici. Poseban akcenat će biti na učešću mladih žena u ovim aktivnostima, te praćenju eventualnih odstupanja od propisanih normi i regula koje se tiču rodne jednakopravnosti.

Mladi aktivisti i aktivistice oformili su 11 lokalnih timova u tri zemlje, prikupili relevantne informacije iz odabranih oblasti i povezali se s drugim akterima na društvenoj sceni. Teme koje su mladi odabrali kao najzanimljivije su zapošljavanje, obrazovanje, zdravstvena zaštita, kultura... U suradnji s institucijama koje pružaju usluge iz ovih oblasti, naši mladi aktivisti će mobilizirati građane i građanke u svojim sredinama da se priključe monitoringu kvalitete usluga, ali i daju svoj doprinos rješenjima uočenih problema.

Posebnu draž ovom projektu daje angažman mladih umjetnika i umjetnica koji putem fotografije, videa, filma i likovne umjetnosti, kreativno dokumentuju sva zbivanja u i oko projekta i na taj način privlače pažnju javnosti na problem diskriminacije, ali i načine na koji joj se možemo sprotstaviti.



World Visionov program razvoja područja Lašva održao je početkom oktobra „Sajam malih projekata“ na platou ispred Omladinskog centra Kakanj, a u organizaciji sa Općinom Kakanj. Na sajmu su partnerske organizacije i osnovne škole prezentirale rezultate malih projekata realizovanih uz finansijsku podršku World Visiona i općina Kakanj i Visoko u toku 2012. godine.

Sveobuhvatnom pristupu transformacijskom razvoju kroz dugoročno partnerstvo sa lokalnim institucijama i organizacijama, kakav je Razvojni program Lašva, cilj je poboljšanje uslova života djece i njihovih porodica. O značaju ovog partnerstva na konferenciji su govorili direktor World Vision Bosne i Hercegovine, načelnik Općine Kakanj, voditelj Razvojnog programa Lašva, te predstavnici partnerskih organizacija.

Razvojnim programom osnažuju se lokalne zajednice u održivom razvoju sa posebnim osvrtom na dobrobit djece i poboljšanje uslova za njihov život. U okviru sajma predstavljeno je 27 malih projekata implementiranih od strane partnera u okviru: Sponzorisanja djece i zajednica, Podrške unapređenju kvalitete obrazovanja, Podrške ekonomskom razvoju i Razvoju civilnog društva. O postignutim rezultatima i njihovom značaju, lično su govorila djeca, učesnici u projektima. Najmlađi učesnici i prezentatori postignutih rezultata bili su djeca vrtićkog uzrasta učesnici u projektu „Informiran, educiran, aktivan“ koji je implementirala NTVIC Kakanj.

„Pokazali smo spremnost da se mijenjamo u skladu sa zahtjevima određenih pristupa u radu i da učimo na greškama, jer je naša ljubav prema djeci pokretač i snaga koju smo prepoznali u sebi. Iz godine u godinu smo tražili najbolja rješenja kako bi djeci omogućili da njihova osnovna prava budu zadovoljena, ali i da budu aktivni učesnici procesa donošenja odluka te da se kroz taj pristup njihov glas čuje“, obraćajući se prisutnim zvanicima naglasila je Amra Kurbegović, voditeljica Razvojnog programa Lašva.

SAJAM MALIH PROJEKATA

napisala

Helena Delić - World Vision



RADOST BOŽIĆA U RAZVOJNOM PODRUČJU LAŠVA

napisala

Helena Delić - World Vision

Učenici osnovnih škola iz Kaknja i Visokog zajedno sa uposlenicima World Visiona posjetili su Franjevačku klasičnu gimnaziju i samostan u Visokom. Zajedničko druženje počelo je ručkom, a nakon dobrodošlice i predstavljanja, učenici osnovnih škola i gimnazije učestvovali su u kreativnim radionicama savladavajući vještine izrade raznih ukrasa, čestitki, kao i sitnih božićnih kolača.

Pomenuta aktivnost je realizovana u okviru World Visionovog Razvojnog programa Lašva, s ciljem doprinosa duhovnom razvoju djece. "U ovo doba pred Božić nama su važne radionice, jer je i kreativnost koju djeca tokom njih ispoljavaju dio duhovne pripreme. Kreativni rad potiče razvoj djece" rekla nam je sestra Celina Vidak, ravnateljica ženskog dijela Konvikta.

Tokom ove posjete osnovnoškolci su obišli Franjevački samostan, etnološku galeriju i biblioteku. "Najviše mi se svidjela biblioteka, a i radionica je bila super. Svidjelo mi se i to što jedni drugima pomažu i što su organizovali humanitarnu akciju. Sve u samostanu mi se svidjelo" podijelila je sa nama utiske Azra iz Visokog. Sedam dana poslije, svi predmeti izrađeni tokom radionica bili su izloženi na Božićnom sajmu, a novac od njihove prodaje usmjeren je na pomoć najugroženijima. World Vision je imao svoj štand na kojem su djeca predstavljala aktivnosti organizacije u njihovim zajednicama, navodeći svoje učešće u programu i od kojeg je to značaja za njih.



**Srcem za djecu
je besplatno polugodišnje
informativno izdanje
organizacije World Vision
BiH.**

IMPRESSUM

izdavač: World Vision Bosne i Hercegovine

www.worldvision.ba

glavna i odgovorna urednica:
Aida Šunje (aida_sunje@wvi.org)

kontakt:

World Vision BiH, Zvornička 9, Sarajevo

tel: +387 33 660 426

fax: +387 33 652 403



WorldVisionBiH